



*Sabtu, 24 September 2022*  
**Ogen: Lukas 10:38-42**



*Ipilihna Simbuli*



**I**bas kegeluhenta megati kal kita iperhadapkan ku bas pilihan, persoalenna, pentar nge kita milih si mehulina la saja man geluhta tapi pe guna kalak sideban? Bagi nina kata kalak pentar *'Wanita diciptakan istimewa tetap tegar meski nyaris menyerah, tetap sabar meski ingin mengeluh, tetap kuat meski hampir terjatuh'*. Enda pe nuriken kerna nentunen pilihan i bas geluh, ngalaken erbage-bage tantangan, mundur nge kita ntah maju, saber nge kita ntah panik, ras sidebanna. Kuga kita selaku diberu i bas nentunen pilihenta, tentuna enda mbelin kal ku bas biak ras kai perayakenta i bas geluh enda.

Percakapen Jesus ras dua kalak diberu si ersenina. Marta ngalo-ngalo rombongan Jesus i bas perdalanenna seh ku kuta. Luar biasa keriahen ukurna, isikapkenna kerina si perlu, ia jadi nyonya rumah si tuhu-tuhu mehuli. Kuskas ia, tapi i bas ia kuskas e murkas ia ngidah seninana si Maria kundul ercakap-cakap ras Jesus. Labo ia ndilo Maria guna nampati tapi man Jesus ia jungut-jungut. Isuriangi Jesus pusuh ras ukur Marta si merawa, ieteh Jesus susah ras gulut kal ukurna nikapken kerina pangan ras keperluan rombongan Jesus. Labo la iergai Jesus si ilakoken Marta, kepeken man Jesus perlun kepe nakan pertendin asangken daging kula. Perlu kal ia kerina si isikapken Marta tapi la ka tersilahi maka pilihan Maria e perlun akapNa. Labo piga kali Jesus banci reh, megiken pengajarenNa seh kal perluna bagi perukuren Marta sekali-sekali nge Jesus singgah ku rumahna, ngelai jadi pilihenna. Apai pe pilihan e mehuli tapi ula nambahi ukur gulut bage pe nembah ate. Moria GBKP perlu kal si pilih simehulina, janah pilihenta e si pertanggungjabaken alu la 'nalahkan' pilihan kalak sideban.